

I museganc fascegn se à vadagnà la medaes

Ence chest an la scola de musega Il Pentagramma e la Bandes de Fascia e Fiem à endrezà la zertificazion del nivel musical per 23 candidac

Musega - I é stac de 23 ence chest an i musizisè de Fascia e Fiem che se à scrit ite a l'èjam per ciapèr la medaa de merit musical. Se trata de na zertificazion che vegn endrezàda da la Scola de Musega "Il Pentagramma" adum con la Bandes de Fascia e Fiem per ge dèr l met ai sonadores de poder ciapèr la prestigiosa medaa da se tachèr sul corpet.

Tel Sudtirol l'è oramai na tradizion la zertificazion del nivel musical di sonadores de la Museghes che aldò del nivel arjont dèsc fora la medaes de bron, arjent e or. I maestres de la Bandes de Fascia e Fiem à volù la portèr ence tel Trentin per ge dèr l met ence a nesc sonadores de vegnir valutè aldò de sia capacità e de sia competenzes musicales.

Na scomenzadiva che - descheche à spiegà l diretor de la scola de musega Ezio Vinante - la é nasciuda proprio per ge dèr n strument de più ai bandisè en attività da n mule de egn de se meter en jech. No l'è sori per chi che no à fat la scola de musega se meter a studièr per n concurs e cogner sonèr tedant a na juria, ma i lo fèsc con serietà e convinzion e chest l'è emportant soraldut percheche a chesta vida se aua l nivel e la calità de la Bandes de noscia valèdes."

En sabeda ai 30 de mèrz l'è stat la audizions te la senta de la Scola de musega a Tieser e chiò i bandisè à portà dant sia esecuzion tedant a la juria. 16 sonadores se à dat jù col



Ivan Pederiva de la Musega da Vich à vadagnà la medaa de arjent.

program per ciapèr la medaa de bron, 3 per ciapèr chela de arjent e 4 per chela de or. Chest an i strumenc ametui a concurs l'era i otons e la percusions; l prum an l'era stat tegnù duc i strumenc ensema, ma se à vedù che l'era massa scric ite, coscità da l'an passà la direzion à preferì i spartir.

L program pervede a n toch de obliè e doi o più toc cernui da l'esecutor da poder portèr dant ence col compagnament del pianofort.

Da les 6 da sera l'è stat l'èjibizion averta al public di cater musizisè che se à scrit ite per la medaa de or:



Con la zertificazion del nivel musical di sonadores duta la Museghes se n miora.

Michele Vinante de la Musega de Tieser al bas, Nicola Sartori de la Musega de Verla al corn, Mattia Vanzetta de la Musega de Tieser al bombardin e Nicola Zorzi de la Musega de Juan e Pardac al bombardin. Cater esecuzioni dalbon de aut nivel che é states aprijiedes da la juria e dal public. Te la comiscion, che tolea ite professores e esperc fora da la Scola de musega che à valutà a na vida meticolousa duc i candidac, l'era ite Valerio Dondio, Mauro Piazzi e Claudia Pallaver, ensema al diretor de la scola Il

Pentagramma Ezio Vinante.

Sobito dò l'è stat la premiazion di candidac. L diretor Vinante à spiegà che chest an l'è stat uzà l nivel de valutazione: "se é ponté via dal set e no dal sie desche i etres egn - l'è dit - ajache se aea vedù che vèlch candidat no se enjignèa assà e la proa vegnìa tutta mingol a la lijiera."

A la premiazion à tout pèrt ence l president de la Federazion de la Bandes del Trentin Renzo Braus e l raprezentant per Fascia e Fiem Donato Calligari. Duc doi à palesà gran aprijiamet per l nivel di bandisè e i à

dit che a chesta vida ence duta la Bandes se miora con componenc semper più enjigné.

I candidac premié col bron e l'arjent

Chisc i candidac che se à vadagnà la medaa de bron: Katia Girardini de la Musega de Cimego al contrabas, Fabio Zanon de la Musega de Tieser al contrabas, Renato Daprai de la Musega Auta Fascia al corn, Chiara Mazzel de la Musega da Vich al corn, Lorenzo Riz de la Musega Auta Fascia al corn, Andreas Rizzi de la Musega da Vich al corn, Lorenzo Scalabrini de la Musega de Molina al corn, Roberta Bontempelli de la Musega de Molina al bombardin, Martin Diana de la Musega Auta Fascia al bombardin, Nicoletta Riz de la Musega Auta Fascia al bombardin, Patrick Dellantonio de la Musega de Moena a la tromba, Marianna Sontacchi de la Musega de Ciavaleis a la tromba, Riccardo Zanon de la Musega de Juan a la tromba, David Cavada de la Musega de Molina al trombon, Renzo Dezulian de la Musega Auta Fascia al trombon.

Chisc i candidac che se à vadagnà la medaa de arjent: Ivan Pederiva de la Musega da Vich al bas, Angelo Sacco de la Musega de Juan al bas, Roberto Vanzetta de la Musega de Tieser al trombon.

Monica Cigolla